



Di gnot, s'a nol è nulât, un cuc tal cîl ogni tant a ti fâs dismenteâ le marmaie ch'a vose e si tire pai dincj dut il dì in television e su la rêt; ducj a san ce fâ ma nissun al è bon di fâlu. A disin che dut chel vosarili li al sarès la democrazie, parcè che a ju lasse fevelâ ducj e ducj a puedin dî la lôr monade cuotidiane, cussì che i sorestants a fasin ce che a vuelin lôr, tant cualchidun, poçs par veretât, a lu contentin di sigûr; fossie vere, ma par me cont chê siore li, la democrazie, e je une vore malade e no si viodin miedis bogns di curâle. Par dî il vêr a no soi bon nancje jo di cjatâ la midisine juste, e inalore tant vâl tirâ su il cjâf e dai une voglade al cîl ch'al à simpri alc di gnûf di contânus; ancje cence doprâ il telescopi, ma dome a voli crot si pues rimirâ lis maraveis dal cîl di Avrîl. Il planet Mart al fâs di paron tant che chest an ai vot dal mês al sarà l'astri plui luminôs dal cîl, insieme cu la stele Siri che ducj a san jessi la regjine da la gnot; lui par intant si fâs viodi cu la stele Spica te costelazion da la Vergjine, che jessint mancun sflandorose i fâs fâ plui biele figure. E po Joibe, come ch'a mi plâs clamâ il planet Jupiter, che za di cualchi mês al va ator cui Zimui, inte lôr costelazion. E ce dî di chê torzeone di Lune che intun mês e rive a compagnâsi une prime volte cu lis Pleiadis, lis stelutis de costelazion dal Taur, e po dopo cun Joibe, Mart, Saturni e Bielestele par tornâ a la fin insieme cu lis Pleiadis. Chest mês po un grup di astronoms brasilians al à fât un scuvierte une vore strambe, vint olmât un asteroit di non Chariklo cun doi anei, tant che il planet Saturni, che al sarès il cuint astri cu la corone ch'a si cognossi; al somee che

cheste corone e sedi fate di fruçons di altris clapons che a si son pocàs fra di lôr fasint une fracassine. A saressin ancje ben cuatri cometis ator pal nestri cîl, lis vecjis cognossincis C/2012 K1 PanStarrs, C/2012 X1 Linear, C/2013 R1 Lovejoy, e la gnove C/2014 E2 Jacques scuvierite in Març dal osservatori SONEAR in Brasîl; pecjât che par viodilis a covente doprâ un bon telescopi, ma vint voie si pues simpri domandâ il jutori di cualchi grup di astrofii cui lôr argagns, che inte Piçule Patrie a no mancjin di sigûr. Cun dut chest ben di Diu di cjalâ là adalt a si pues ancje rassegnâsi a sopuartâ ducj chei cjastrons ca nus remenin la fertaie di e gnot.

di Bepi Zefon